

**IN FUNERE
REVERENDISSIMI
PATRIS ISIDORI
MANCINII EX ORDINE
MINIMORUM...**



I N F U N E R E
REVERENDISSIMI PATRIS
ISIDORI MANCINII
EX ORDINE MINIMORUM
O R A T I O
H A B I T A

A REV. P. F. ANGELO MONCADA ORD. PRAEDICAT.
IN COLL. URB. DE PROPAGANDA FIDE PHILOSOPHIAE
PRAECEPTORE.




R O M A E , C I D I C C L V I .
EX TYPOGRAPHIA ANGELI ROTILII
IN AEDIBUS DE MAXIMIS.

SUPERIORUM FACULTATE.

I M P R I M A T U R.

Si videbitur Reverendissimo Patri Sacri Palatii Apostolici Magistro.


F. M. de Rubeis Patriarch. Constantinop.



I M P R I M A T U R,

Fr. Vincentius Elena Ordinis Praedicatorum Reverendissimi Patris Sacri Palatii Apostolici Mag. Socius.

1991



O R A T I O.



SIDORUM MANCIINIUM, illum, illum inquam, cui florens etiamnum aetas, nequidum annum quadragessimum quartum praetergressa, diuturnam vitae usuram, robur viresque corporis, secundam ac prosperam valetudinem, institutus ad omnem laudem vitae cursus altissimos quosque atque amplissimos honorum gradus, studia hominum erga eum summa atque flagrantia certissimam suffragationem atque omnia adjumenta polliceri, & quodammodo offerre videbantur, repente, praeter omnium expectationem, contraque omnium vota, alienissimo suorum, atque adeo Reipublicae tem-

pore , mortifero morbo sublatum , pro-
dolor ! amissimus . Me miserum ! Cur ego
in tam acerbo luctuosoque casu cum uni-
versa civitate moerere , ac tacitus in soli-
tudine ac tenebris lugere non finor ? Sal-
tem spatium , dum se dolor frangeret , or-
natissimi Minimorum familiae sodales , tri-
buissetis . Pauculis nocturnis horis , iisque
in dolore luctuque consumtis , quid potui
ad consolandum vos excogitare , qui , stu-
diorum meorum hoc ducetanto atque prae-
sidente orbatus consolatione omnium maxime
indigeam ? Nunc , quoniam me loqui volui-
stis , ita loquar , ut serviam tamen dolori
meo ; vosque a luctu non modo oratione
mea non abducam , sed ut a luctu ne a quo-
quam in posterum abduci velitis , adhor-
tabor . Sic enim sentio , jure a vobis in
ISIDORI MANCINII obitu acerbissimum dolo-
rem esse susceptum , nec eum ab iisdem
vobis posse aliquando deponi , quin exi-
miae MANCINII virtutis memoriam , per
summam injuriam , abjecisse videamini .

Est ne igitur quidquam , in omni homi-
num vita , virtute amabilius ? Scilicet il-
lius

lius in animis nostris speciem pulcherri-
mam natura ipsa informavit, eadem amo-
res mirificos inchoavit. Ad illam enim in-
fantes ferimur, atque illius pulchritudine
mirifice oblectamur; tantumque capimur
honesti specie, ut, siquando etiam ab ho-
nestate recesserimus, honestos tamen ho-
mines diligamus. Hinc vehementer nos
angi necesse est, si distrahi a nobis quem-
piam divellique contigerit, cujus cum
virtute mores conjunctos esse intellexerimus.
Etenim, quo majore in amore est illud,
quo fruimur, eo graviolem ex illius amif-
sione consequi dolorem & luctum oportet.
MANCINII autem virtus illa divina, & pro-
pemodum incredibilis, quem non allice-
ret, atque ad sui amorem raperet? Nam
cum omnis virtutis, atque honestatis duo
sint initia, & quasi fontes, ex quorum al-
tero adversus Deum, ex altero adversus
homines officia oriuntur, maximeque sint
ista inter se copulata, atque conjuncta, ut
minime separari possint; tantum ille ho-
minibus tribuebat, ut primas se Deo de-
bere intelligeret. Itaque nihil prius habuit,

nihil antiquius , quam ut Canonicas Ecclesiae preces ad Deum funderet, sacrisque castissime operaretur . Adiisses hominem summo mane negotii causa ; offendisses Deo , aut Deiparae supplicantem : nihilque umquam humani operis est aggressus , antequam Divina perfecisset . Quid ? Miramur , antiquissimam illi rerum divinarum curam fuisse , qui humanas omnes contemnere , ac pro nihilo ducere tam mature instituisse ? Paullam in Calabria patriam sortitus , ibique honestissimo loco natus , adolescens , ac pene puer tertio decimo nempe aetatis anno , ad Minimorum sodalium aedes , ubi se Deo totum dederet , advolavit : coepitque jam inde ex eo tempore ita ad caelestia animo ferri , ut neque studiorum summa contentio (in quibus , sive discipulus Consentiae , ac Romae , sive Magister Romae , ac Neapoli longe aequalibus suis , atque etiam majoribus natu praestitit) neque Praefecturarum , ac munerum multiplex , atque assidua occupatio , hominis mentem a prima illa cogitatione umquam deduxerit . Nolite vero existimare aut inter-

termiſſum ab eo fuiſſe, aut certe remiſſum vivendi hoc inſtitutum, cum ad ſodalium ſuorum gubernationem a ſupremo Ordinis moderatore haud ita pridem eſt evocatus. Idem enim ei ſemper curſus vitae fuit, eadem ratio. Roma iter cogitabat in Hiſpaniam, ceteraſque Europae longinquas regiones Minimorum Familiae Praeceptor ſummus, ac Parens. Erat autem ei propoſitum, ſui Ordinis domos, atque coenobia, quae ſunt ab Italia remotiora, ex majorum conſuetudine, atque praefcripto luſtrare. Itaque de eo homine deligendo ſecum ipſe cogitat, qui res italicas, abſente ſe, adminiſtrare ſapienter poſſit. Non diu deliberandum ei fuit. Obverſabatur enim illius animo MANCINII probitas eximia, & prudentia non vulgaris. Hunc igitur advocat, ſui conſilii participem facit, Vicarium generalem creat. Incredibile proſecto eſt, Auditores, quanta omnium ſit laetitia conſecuta. Univerſi MANCINIO gratulantur, univerſi ſe, ſuaque omnia eidem deferunt ac pollicentur, Patris eum loco habent, ac venerantur. Nec vero ſeſellit eorum ſpem

spem , atque expectationem eventus . Etenim quidquid benignitatis , quidquid beneficiorum potuit a MANCINIO proficisci , in eos sane liberaliter collatum est . Nihil boni ab eo petierunt , quod non impetrarint : in fontes vero , si qui aliquando existerent , ita demum ad animadvertendum paratus erat , ut facile a se supplicium deprecarentur , quos & facti sui paeniteret , & certa spes esset , etiam non adhibita animadversione , in officio futuros . Ita ille severitatem clementia , clementiam severitate temperabat . Qua sane conjunctione factum est , ut suis , quibus pro auctoritate imperabat , semper satisfaceret . Nec vero non item externos , atque alienos sibi mira quadam cum morum suavitate , tum sermonis affabilitate conciliabat . Atque ille quidem dabat se omnibus . Quidquid illi erat a necessariis occupationibus otii , totum id aliorum temporibus impendebat . Quare quotidiani ad illum fiebant hominum concursus , quibus tum consilio , tum opera , quantum quidem facultas patiebatur , minime deerat . Quanquam quid
ego

ego plura de MANCINII singulari in Deum religione , erga homines caritate , gubernandi dexteritate , & scientia , miseratione in egenos , in omnes beneficentia dicam ? Neque haec , neque alia virtutum ejus exempla , temporis angustiae , in quas concludenda mea haec oratio est , completi me , ac persequi sinunt . Itaque tacitus praetermittam aequabilitatem illam , animique constantiam , qua & adversas res tolerabat , nec secundis efferebatur ; silentio praeteribo despicientiam illam , contemptumque sui , quo , quantum se summis honoribus dignum virtutis actione continenti praebebat , tantum ne infimos quidem sibi deberi existimabat . Jam vero nihil attinet commemorare quantum semper scribendo , loquendoque caverit , ne quidpiam de aliorum existimatione detraheret ; quantum ab omni litteraria etiam contentione abhorruerit ; quantum se ad illorum arbitrium , ac voluntatem , in quorum imperio , & potestate erat , accommodarit . Unum breviter dicam , MANCINII mentem fuisse ad omnem virtutem a natura factam , eumque ab ipsa ado-

adolescētia tantum in ea profecisse, quantum pauci solent confirmata jam, & matura aetate; neque eum a vitio ad virtutem; a turpitudine ad honestatem esse revocatum; verum initio statim a laude facto semper ad laudabilia processisse: ut quantum proni sunt in vitium plurimi atque proclives, tantum ipse alacer ad virtutem erectusque videretur.

Nunc quoniam de ISIDORI MANCINII adversus Deum hominesque pietate haec pauca de multis ac breviter diximus, quae satis tamen efficiunt, ut quantum damni in tam praestantis tamque omni laude cumulati viri morte fecerimus, intelligamus; nonnulla etiam de ipsius ingenii doctrinaeque divina pene facultate dicemus; quo magis in tantae, & tantam ad gloriam efflorescentis sapientiae jactura doleamus. Quamquam possumus sane hoc loco, qui certe est uberrimus, sine cujusquam reprehensione esse breviores. Etenim MANCINII excellens ingenium singularisque doctrina non valde desiderat orationem nostram; cum hujus totius nostrae Urbis tot academiae & quasi domicilia sapientiae MANCINIUM
di-

disputantem exceperint, audiverint, numquam sine laudis significatione dimiserint. Parietes mihi quidem ipsi Romani ipsius Lycei, cui ab Sapientia nomen datum est, toto orbe celebratissimi, quodammodo videntur vocem, continere non posse; iidemque MANCINIUM veterem cultorem studiorum suorum, & quasi vindicem compellare: nos te, MANCINI, pene adolescentem complexi sumus; tibi nos & doctrinam, & dignitatem, & dignitatis insignia tradidimus. At vero quantum a nobis in te honoris collatum est, tantum ipsi a te ornamentum ac splendoris accepimus: ut nihil tu nobis debere, quod, quae acceperis, cumulate reddideris, sed nos tibi potius plurimum debere videamur. Has equidem videor Gymnasii nostri omnium principis haurire auribus voces, MANCINII doctrinae singularis, & praestantissimi ingenii testes. Verum opus non est, ut ego res hinc remotas, & sermonis usu destitutas, loquentes inducam. Vos, Vos inquam, qui hic adestis, quique illum saepe, dum viveret, de gravissimis rebus differentem audistis, testes esse volo, laudatoresque MANCINII in omni

di-

disciplinarum genere eruditionis atque doctrinae. Quoties, cum de Caelitibus Sanctorum fastis adscribendis difficilior controversia incidisset, MANCINII sententiam & plurimum efflagitastis, & maximi faciendam esse decrevistis? quoties, cum de abditissimis atque obscurissimis rerum fide divina credendarum quaestionibus ageretur, illum, ut sententiam diceret, rogavistis, quam cum dixisset, eamdem firmam & ratam haberi voluistis? Itaque omnium sapientium communis ea vox erat, illud apte atque tuto dijudicari, quod MANCINII suffragio dijudicaretur. De cujus viri in Theologicis rebus facultate cum late opinio percrebuisse, eamque Pontifex Maximus BENEDICTUS XIV. esse verissimam comperisset, continuo de eodem ornando, amplificandaque ejus dignitate cogitare coepit. Accidit autem per id tempus, ut, Thoma Sergio viro doctissimo eodemque modestissimo è vivis erepto, Collegii Urbani de Propaganda Fide studiorum praefectus esset illi subrogandus. Erant tum Romae, ut hodie sunt, eruntque semper, Viri docti plures ac probi, quibus

bus recte commissum iri tantum munus ab omnibus putaretur. Verum MANCINII tantam virtutem diutius sine praemio esse noluit Sapientissimus Pontifex; suaque sponte ac voluntate MANCIUM, praeteritis ceteris, Gymnasio praeficit. In quo maximum is quidem tulit ingenii sui doctrinaeque fructum. Quid enim honorificentius ad commendationem & laudem omnium populorum, quam illum tanti a tanto Pontifice habitum esse, ut eo munere dignus judicaretur? BENEDICTUM sane XIV. cum nomino, videor mihi Sapientiam ipsam nominare: ut, qui ejus judicio probatus sit, ipsius Sapientiae judicio & quasi voce probatus esse videatur. Atque ejus quidem de summo viro opinionis illustriora argumenta fuisse nos habituros, si paullo vita MANCINIO diuturnior contigisset, non mea magis sententia est, quam hujus praedicatio Civitatis universae. Qua spe atque expectatione plerique commoti praecipiebant jam animo incredibilem voluptatem; nec modo homini, ejusque Ordini spectatissimo, verum etiam bonis omnibus non usitatam honoris accessionem futuram

ram gratulabantur : nec dubitabant , quin tam egregia cum doctrina ; tum virtus celsiore tandem in loco constituta & esset illustrior , & majores Reipublicae Christianae utilitates allatura . Sed me plura parantem dicere impedit dolor , in illa cogitatione defixum , non quantum boni ille moriens amiserit , sed quantis nos , illo mortuo , commodis exciderimus . Omnino magnam plagam , & , quemadmodum nunc quidem reor , insanabilem , in tam excellentis viri tam praepropera acerbaque morte accepimus . De se , ut quisque volet , sentiat , & de animi sui robore sibi suo arbitratu blandiatur . Equidem plane concidi , nec meam mentem post casum tam gravem , tamque inopinatum , meliorum ad rerum cogitationem possum traducere : ac valde vereor , ne aetas ipsa , quae vel magno dolori mederi solet , curam hanc meam longinquitate reddat graviolem . Dixi .



